

3. ვაზიანი.

უბრალო

ჭეშმარიტებანი.



გაზეთ „იმერეთის“ გამოცემა.



ქუთაისი.

სტამბა „ძმობა“, პუშკ. ქუჩა, სახლი გოკიელისა

1914

უბრალო ჭეშმარიტებანი.

I

როცა ქვეყანას ემუქრებიან, ძალნი ბუნებისა, როცა ქვეყანას მოელის ხოლერა, თუ შავი-ჭირი, სიმშლილი, თუ მტრისგან აოხრება, მაშინ ყოველივე პატრიოსანი ხალხი განურჩევლად პარტიებისა, კლასისა, სარწმუნოებისა და ასაკისა, მოიკრებს ხოლმე მთელ თავის ძალღონეს, შეაერთებს ხოლმე თითოეულის ცოდნასა და ნიჭს, რომ შეერთებულის ძალებით გაუმკლავდეს ქვეყნის საერთო უბედურებას.

მე მგონია, რომ ამჟამად ჩვენი ქვეყანა განიკდის ერთ-ერთ ამ საერთო უბედურებას... აი, ამიტომ მე მინდა მივმართო არა ამა თუ იმ დასს, არა ამა თუ იმ კლასს და სარწმუნოების აღმსარებელს,

არა! მე მსურს მიემართო ყველას ერთად; ვინც კი ჩემს სამშობლოში ცხოვრობს და მოვახსენო შემდეგი:

ვიდრე ახალი სახლი არ დამთავრდება, ძველს არ დაანგრევენ ხოლმე. ვიდრე ახალ უფლებებს არ შეიძენენ, ძველ უფლებებზე ხელს არ აიღებენ ხოლმე, რაც უნდა უბირი და საპყარი იყოს ეს უფლებანი.

ეს საანბანო ჭეშმარიტებაა და ამის მტკიცებასაც არ დავიწყებ, ვინაიდან ჭკუათა მყოფელი კაცისათვის ეს თავისთავად ცხადია და ასედაც იქცევა. მაგრამ განა ასე ვიქცეოდით ჩვენ, ქართველები, მთელის წარსულის საუკუნის განმავლობაში? განა ასე ვიქცევით დღესაც? ვეჭვობ და ვეჭვობ დიდათაც...

წარსულ საუკუნის დასაწყისში ჩვენ გვქონდა არჩევნებზე დამყარებული მმართველობა (ადმინისტრაცია); ჩვენ გვქონდა

ამავე არჩევნებზე დაფუძნებული სასამართლო ეროვნულის კანონმდებლობით (სჯულდება ვახტანგისა), ჩვენ გვქონდა ჩვენი ეროვნული ავტოკეფალური ეკლესია, რომელსაც განაგებდა ხალხის მიერ არჩეული კათალიკოსი, ჩვენ გვყავდა ჩვენი ეროვნული ჯარი, შეკრებილი იმ წესითა და სისტემით, რომელსაც თავგამოდებით ქადაგებს დემოკრატია მთელის ევროპისა.

ღიან, ყველა ეს გვქონდა და გვყავდა, მაგრამ ყოველივე ეს დავკარგეთ, ვერ შევირჩინეთ... როგორ და რანაირად? ამაზე არას ვიტყვი. ყველას კარგად მოეხსენება როგორ დავკარგეთ და რატომ ვერ შევირჩინეთ.

მსგავსად რეგვენის სახლის პატრონისა, ჩვენ დავანგრიეთ ძველი სახლი, -- იმ დროს, როცა ჯერ ახალი არ აგვეშენებინა, ჩვენ დავკარგეთ ძველი უფლებანი,

იმ დროს, როცა ახალი ჯერ არ შეგვე-
ძინა. ჩვენ მოგვიცვა უფლებობის წყვდი-
აღმა, ჩვენ ჩაგვანთქა საყოველთაო უმეც-
რებამ, საყოველთაო სიბრიყვემ: და რაც
უფრო ყველაზე საოცარია ჩვენ ფუქსა-
ვატურის თვალთ ვუყურებთ იმ უბედუ-
რებას, რომელიც თავზე დაგვატყდა!..

საქმე იქამდისაც კი მივიდა, რომ ცრუ,
ვითომდა მეცნიერნი მეცნიერების სახე-
ლითვე არა თუ ამხილებენ და დასცი-
ნიან იმათ, ვინც სწუხან ამ უფლებათა
დაკარგვის გამო, არამედ დასცინიან და
მასხარათ იგდებენ თვით ჩვენს ძველ უფლე-
ბებსაც. ზოგნი ხომ—რომელთა რიცხვიც
მრავალზე უმრავლესია—სახელითა დე-
მოკრატიის უმაღლეს იდეალებისა, სახე-
ლითა სოციალიზმისა და საერთაშორისო
ურთიერთობისა, სწყველიან არა მარტო
ჩვენს ძველ უფლებათ, არამედ სწყველიან
და ეზიზღებათ ის წარსულიც, რომელ-

მაც ჩვენ გვიანდერდა. ის უფლებანი. ასეთი ფაქტი, ასეთი მოვლენა ერთად ერთია მთელის ევროპის ისტორიაში!.. ის ხალხი, რომელმაც დაჰკარგა თავისი ჭერი და კერა, მოხარულია უსახლკარობისა გამო, ის ხალხი, რომელმაც დაჰკარგა თავისი მეობა და უფლებანი, ტაშს უკრავს თავისს დამონებასა!..

მე გადაქარბებით არას ვამბობ! აბა თვალი ადევნეთ ჩვენ პარტიულ პოლემიკას—მერე როგორ პოლემიკას!—აბა ყური დაუგდეთ დემოკრატიის ყალბ ორატორებსა, თუ მქადაგებლებს და დამეთანხმებით, რომ მე არ ვაქარბებ.

გაბოგანოებულებმა, უფლება აყრილებმა პარტიულის პოლემიკისა და კინკლაობისა გამო, მგონი, ნიჟიც კი დავკარგეთ უბრალო აზრის გაგებისა, შეთვისებისა!..

რისთვის, რომელის უმადლესის მოსაზრებით უარსა ჰყოფენ, მაგალითად, თუნდა

ჩვენი დასელები არჩევნებზე დამყარებულ
იმ მმართველობას, რომელიც ჩვენა გვექონ-
და ძველათ?

— ყველა ამას ჩვენ უარსა ვყოფთ სა-
ხელითა უმაღლეს სოციალურ იდეალისა,
სახელითა თანამედროვე დემოკრატიულ
ერთობისაო.

— გვიპასუხებენ ისინი. არჩევის უფ-
ლება მაშინ მხოლოდ აზნაურებსა და
სამღვდელოებას ჰქონდა. ეს კი უპირა-
ტესობა, პრივილეგია იყო და ჩვენ-კი და-
უძინებელი მტრები ვართ ყოველივე უპირ-
ატესობისაო.

— კემმარიტად—ვუპასუხებ მე—ყო-
ველივე უპირატესობა საზიზღარია და
მოსასპობიც. უფლებათა თანასწორობა,
განურჩევლად სქესისა, საფუძველია თანა-
მედროვე საზოგადოებრივობისა, აქეთ მი-

ისწრაფვის დემოკრატია მთელის ქვეყნი-
სა. ძალიან კარგი და პატიოსანი, მაგრამ
ჩვენში განა ხმა ამოიღო ვინმემ არჩევან-
ზე დამყარებულ ეროვნულ მმართველო-
ბის დემოკრატიზაციის შესახებ? განა
კრინტი კი დასძრა ვინმემ მაშინ, როცა
ნაცვლად, თუმცა ცუდისა, მაგრამ სამშობ-
ლო ენაზე საქმისმწარმოებელ მმართვე-
ლობის მაგიერ, ჩვენ ხალხს თავზე მოა-
ხვიეს უცხო მმართველობა, უცხო ენითა
და ზნე-ჩვეულებით? თუ ეს უცხო ენა
ვაივაგლახით ესმოდა ჩვენ მაღალ წო-
ლებასა და ინტელიგენციას, განა იგი
დღესაც გაუგებარი და უცხო არ არის
ჩვენის ხალხისათვის, ე. ი. ორ მილიონ
მშრომელ ხალხისთვის!.

თუ ჩვენი დასულები მარტო სიტყვით
არ არიან დემოკრატები, მათი წმინდა
მოვალეობაა — იქადაგონ სამშობლო ენის

აღორძინებისა და ეროვნულ მმართველობის დამყარების შესახებ.

ყველასი, და ნამეტნავად დემოკრატიის, ბუნებრივი უფლებაა განსჯილი იყოს თავის სამშობლო ენაზე, ყველასი, და უფრო კი დემოკრატიის, ბუნებრივი უფლებაა პირადი და საზოგადო საქმეები მოაწყოს სამშობლო ენაზე, იმ ერთად ერთ ენაზე, რომელიც იმას ესმის. ვინც დემოკრატიას უჭერს მხარს, იმისი მოვალეობაა დაიცვას პიროვნების ეს უმადლესი და უუწმინდესი უფლება.

— მაგრამო— მიპასუხებენ დასელები, ეს ხომ ნაციონალიზმია და ჩვენ კი...

რაცა გნებავთ, ის სახელი უწოდეთ, მაგრამ იცოდეთ კი, უამისოდ თქვენ დემოკრატი, თანასწორ უფლების დამცველი არ ხართ. რა სახელიც უნდა დაირქვათ, უმადლეს იდეალების რომელ დროშასაც უნდ ამოეთართ, თქვენ არადე-

მოკრატობას ვერ დაჰფარავთ. ადრე თუ გვიან, ხალხი გაგიგებთ ცუდლოტობას და გამცემელს გიწოდებთ, სულ ერთია ნებსითია ეს გამცემლობა, თუ უნებლიეთი.

— ჩვენ სოციალ-დემოკრატები, რუსეთის ამ დიდებული პარტიის წევრები და გამცემლობა?...

— ვიცი!... ასეთი დაძახილი დიდი უსამართლობაც იქნება, ვინაიდან... ექვი არავის აქვს, რომ თქვენ ერთგულად გიყვართ ხალხი და მუშათა კლასი, მაგრამ რათ ხმარობთ და ეფარებით ისეთ ტერმინებს, რომლებიც არ შეეფერება და ვერც გამოხატვენ სოციალიზმისა, დემოკრატიისა და ერთა შორის ძმობა-ერთობის დამამყარებელ უმაღლეს პრინციპებს? აი, მაგალითად, თქვენ დადევით რუსეთის პარტიის დროშის ქვეშ. ამითი ხომ თქვენ თქვენს თავს აცხადებთ არა ინტერნაციონალისტებათ, არამედ თქვენ

თავს აცხადებთ იმპერიალისტებათ. რუსეთი იმპერიაა და არა ნაცია. რაკი თქვენ იმპერიალისტი ხართ, მაშასადამე, თქვენ საფალდებულოთ მიგაჩნიათ საიმპერიო ენა, საიმპერიო მმართველობის ერთიანობა. ამით თქვენ ლალატობთ, უარყოფთ ძირითად პრინციპს დემოკრატიისას — ავტონომიურ მთავრობებს. თვითმართველობას ეროვნულ ენაზე. ეს კიდევ ცოტაა. ხართ რა იმპერიალისტები, და გრწამთ რა ცენტრალიზმი მართვა-გამგეობისა, და ამავე დროს თქვენ სოციალისტურ პროგრამას ამყარებთ რა „კომუნისტურ მანიფესტზე“, — თქვენ უქადით ჩვენ გლახობას გაბოგანობას, თქვენის მეოხებით დაჰკარგავს იგი თავის ბაღ-ვენახებს და გარდაიქცევა უსახლკარო, უფლება-აყრილ მოჯამაგირე-საღდათად შრომის ლაშქრისა.

ყოველი სოციალდემოკრატი, რომელიც ამ სტრიქონებს წაიკითხავს, უფე-

ჰველია გულის წყრომით მომიხსენებს და იტყვის: „საზიზღარ ცილსა გვწამებს, განგებ დამახინჯებს ჩვენის პარტიის პროგრამასაო!“ გარწმუნებთ, მე არც ცილისწამებისათვის მცალკია და არც ვისივე პროგრამის დამახინჯებისათვის. მე ღრმათა მწამს გულწრფელობა და პატიოსანი მისწრაფება ჩვენის დასელებისა. მე მსურს მხოლოდ გამოვარკვიო მიზეზები, წყარო ჩვენის საერთო უბედურებისა, ჩვენის დაკნინებისა, ჩვენი საზოგადოებრივობის უძლურებისა. მე მსურს დავაჯერო ჩემი თანამოძმენი, ჩემი თანამემამულენი, რომ სათავე ყოველივე სიგლახისა, ყოველივე უბედურებისა ისევ ჩვენშივეა. მიზეზები ჩვენის გათახსირებისა გამომდინარეობენ ჩვენის საზოგადოებრივ საზრისა და ჩვენში მომქმედ საზოგადოებრივ ღრასთა პროგრამების ფორმულათა არეგ-ღარევისა და გაუგებ-

რობისაგან. აი, ამიტომაც ვამბობ, რომ არ შეიძლება მეთქი ერთსა და იმავე დროს კაცი, ადამიანი ინტერნაციონალისტიც იყოს და იმპერიალისტიც. რუსეთი ნიშნავს იმპერიას, სახელმწიფო, იმპერია კი ჰყლაპავს ეროვნებებს, განურჩევლად სარწმუნოებისა, მოდგმისა და ენისა; იმპერიის გაძლიერებასა და მთლიანობას ექვემდებარება ყველა ადგილობრივი ეროვნული უფლებანი და ინტერესები.

იმპერიალიზმი სრული მოპირდაპირეა ინტერნაციონალიზმისა, ერთი მეორის მოწინააღმდეგე ცნებაა. იმპერიალიზმი უმორჩილებს ყველა ერებს თავის პოლიტიკის ინტერესებს, ინტერნაციონალიზმი კი სცდილობს ძმურის, კავშირით შეაერთოს თანასწორ უფლებიანი, ავტონომიური, თავის თავის გამგებელი ნაციები... არა სახელმწიფოები, არა იმპე-

რიები, არამედ ნაციები, ერები-მეთქი....
გაიგეთ? ნაციები და არა სახელმწიფოები!
ჩვენი დასელები კი, გაუგებრობისა და
უმეცრების წყალობით, თავის თავს ინ-
ტერნაციონალისტებს უწოდებენ და
ამავე დროს იმპერიალიზმის დროშის
ქვეშ კი დგებიან.

აქედან გამომდინარეობს მათი დუხ-
ჭირი მდგომარეობა, მათი ტრალიზმი:
იმპერიალიზმის გულისათვის ჩვენი და-
სელები უარსა ჰყოფენ ჩვენს ეროვნულ
უფლებებს, სასამართლოს, სკოლას და
არჩევნებზე დამყარებულ მართველობას
ქართულის ენით, რომელი ენაც მხოლოდ
ესმით გლახობასა და მუშებს საქართვე-
ლოისას, თუმცა ამავე დროს, როგორც
ყველამ ვიცით, ჩვენი დასელები მთელ
თავის ძალღონეს სწირავენ ჩვენის ხალ-
ხისა და მუშების კეთილდღეობას. განა
ეს ტრალიზმი, სიდუხჭირე არ არის? განა

ეს არ უდრის იმ რეგენულ საქციელს, როცა ძველ სახლს ანგრევენ და ახალი კი არსადა სჩანს?...

II

არა ნაკლები სიღუბეა და ტრადიციები გამომდინარეობს ჩვენთვის იმ გარემოებიდანაც, რომ... რიგიანათ... არ ესმით და არეულ-დახლართულათ გამოსთქვამენ ხოლმე... პრინციპებს ფედერალიზმისას, სოციალიზაციისასა და ავტონომიისას. გაუგებრობა და გაურკვეველობა იმ ცნებათა, რომლებიც ამ საკითხებს შეეხება და რომელთაც აღიარებენ ჩვენი საზოგადოებრივი დასები, წარმოსდგება იმ ბუნდოვანობისა და გაურკვეველობისაგან, რომელიც გამეფებულია გერმანიის სოციალ-პოლიტიკურ ლიტერატურაში, რომელ ლიტერატურის ზეგავლენითაც, სამწუხაროთ, შეპ-

ქმნა ჩვენმა თანამედროვე თაობის უმრავლესობამ თავისი საზოგადოებრივი იდეალები.

ფილოსოფიურათა, მეცნიერულათა და არტისტიულათ უმაღლესად განვითარებულნი გერმანია პოლიტიკურათ ყველაზე ჩამორჩენილი ქვეყანაა მთელს ევროპაში. კონსტიტუცია და სამოქალაქო კანონმდებლობა გერმანიის სახელმწიფოებისა დღევანდლამდის სავსეა საშუალო საუკუნოების ფეოდალიზმითა და უუფლებობით. პრუსიის კონსტიტუციით, მაგალითად, მუშათა კლასი და გლეხობა პრაქტიკულად მოკლებულნი არიან საარჩევნო უფლებას, სიტყვისა და კრების თავისუფლებას. ასევე არის საკსონიისა და სხვა სახელმწიფოებში. არას ვიტყვი ჰოლანდიასა, შვეიცარიასა, საფრანგეთსა და ჩრდილო-ამერიკის შეერთებულ შტატებზე, რომლებიც ითვლებიან აკენათ თავისუფლებისა თვით ესპანიაშიც კი კონსტიტუცია და პოლი-

ტიკური უფლებანი მუშათა კლასისა უფრო ლიბერალური და ფართოა.

გერმანიაში სოციალდემოკრატები კრების თავისუფლებათ სთვლიან პოლიციის მიერ ნებადართულ ლექციას, რომელსაც პოლიციის წარმომადგენელი ესწრება და ყოველწუთში შეუძლია შესწყვიტოს ეს ლექცია, მაშინ, როდესაც ზემოდ-დასახელებულ ქვეყნებში ხალხი იკრიბება, საცაუნდა, და როცა სურს, ლექციებს კითხულობენ და მსჯელობენ რაზედაც ნებავთ და ამის ნებართვას არც არავისა. სთხოვენ და არც არავისა ჰკითხავენ.

გერმანიის კოროლოებისა და თავადების კავშირი თვით სოციალდემოკრატებს ფედერალიზმათ მიაჩნიათ. მოკავშირე სახელმწიფოებს შეიძლება კონსტიტუციონალური სხვადასხვა დაწესებულება ჰქონდესთ, ან სულ არა ჰქონდესთ იგინი. ფედერატიულად კი შეკავშირდებიან ხოლმე ერე-

ბი, ანუ ოლქები და პროვინციები. ამგვარ კავშირს საფუძვლად უდევს ხოლმე ხელშეკრულობის ხარტია, რომელიც უზრუნველყოფს პოლიტიკურსა, თუ სხვა ყოველგვარ უფლებას იმ ავტონომიურ ოლქებისას, რომლებიც შედიან კონფედერენციაში. ასე, მაგალითად, რა ადგილობრივი დაწესებულებანიც არ უნდა დაიარსონ, ან რა კანონებიც არ უნდა შემოიღონ ჩრდილო-ამერიკის 48 ავტონომიურმა შტატებმა, ან შვეიცარიისა 22 ავტონომიურმა კანტონმა; თანასწორუფლებიანობა, პიროვნების ხელშეუხებლობა, საყოველთაო საარჩევნო უფლება, — უფლება იმისა, რომ ყველა მოქალაქეს შეუძლია არჩეულ იქნეს, არამცთუ ამა თუ იმ დაწესებულების მოხელე, არამედ პრეზიდენტაც კი, უფასო, საყოველთაო და სავალდებულო სწავლება და საზოგადოებრივი (კომმუნალური) აღზრდა ობლებისა, უცვ-

ლელად სავალდებულოა მთელის კონფედერაციისათვის. გერმანიის სახელმწიფოთა კავშირში კი ამისთანა არა ხდება.

ჩვენს ინტელიგენციას კი — და მათ გავლენით მუშებსა და გლეხებს — წარმოუდგენიათ, რომ გერმანია კაცობრიობის სათაურში სდგას, ის გერმანია, რომელიც ცნობილია მხოლოდ თავისი მილიტარიზმითა და ფილისტერობით. პოლიტიკურად იგი სათავეში კი არა სდგას, არამედ დემოკრატიის უკან მიჩანჩალებს. ჩვენი საზოგადოება "შეცდომაში" შეიყვანა გერმანელთა იმ მყვირალა წიგნაკებსა, რომელთაც ენდვნენ. ნამდვილათ კი გერმანიის ცხოვრება ისე არ არის მოწყობილი, როგორც აწერილია ამ ბაქია წიგნაკებში. ვის არ ახსოვს შესანიშნავი სიტყვები აწუკვე გარდაცვალებულის ლიბკნეხტისა: „ჩვენ არაფისი არ გვეშინია!“ ნამდვილათ კი, აი, რა მოხდა: ერთხელ ამ სახელო-

ვანმა და ყველასაგან პატივცემულმა დეპუტატმა მოინდომა ინგლისურიდან გერმანულათ გადმოეთარგმნა თავისი მეგობარის, ინგლისელ ბაროვისს ლექცია. იქ დამსწრე პოლიციელმა აუკრძალა და გულადი და უშიშარი დეპუტატი იძულებული შეიქნა პოლიციელს მოწიწებით დამორჩილებოდა. განა ეს ტრალიზმი არ არის?

ჩვენ გლახებსა და მუშებს კი არწმუნებენ, რომ ჩვენ სწორეთ გერმანელებს უნდა მივბაძოთო, იმიტომ, რომ... იმიტომ, რომ თუმცა ეს ორმოცდაათი წელიწადია ქადაგებენ და იბრძვიან გერმანელები, მაგრამ იმდენი უფლებაც კი ვერ შეუძენიათ, რაც შეიძინა ჩამორჩენილ ესპანის პროლეტარიატმა!..

ყველაზე უფრო შესაზარი დაუგებრობა და ტრალიზმი ჩამარხულია სოციალურ სამართლიანობის გერმანულ ფორმულა.

ში. ყველას მოეხსენება, რომ მარქსიზმის წმინდათა წმინდა „კომმუნისტური მანიფესტია“.. როგორ არის გამოთქმული აქ ეს სოციალური სამართლიანობა?

საქართველოს მუშებო და გლეხებო, ყური კარგათ დაუგდეთ და დაიხსომეთ, რასაც გპირდებიან.

აი ეს დაპირებანიც:

„საკუთარ ადგილ-მამულების ძალათ-
ჩამოკრთმევა (ექსპროპრიაცია) და მიწის
შემოსავლის გადადება სახელმწიფო ხარ-
ჯების დასაფარავათ“...

„კრედიტის ცენტრალიზაცია სახელ-
მწიფოს ხელში... განსაკუთრებულის მო-
ნოპოლიით.“

„მიმოსვლისა და ბარგის საზიდ საშუა-
ლებათა ცენტრალიზაცია სახელმწიფოს
ხელში.“

„გამრავლება სახელმწიფო ფაბრიკების
რიცხვისა.“

„ღამუშავება მინდვრებისა საქრთო გეგმით.

„ღაარსება შრომის ღაშქრისა, განსაკუთრებით მიწისმოქმედებისათვის“.

ყველგან სახელმწიფო, ყველაფერი სახელმწიფოსათვის, ყველაფერი სახელმწიფოს - მიერ. მუშებს რალა? დღიურათ მუშაობა სახელმწიფო ქარხნებში. გლებებს? გლებებმა თავისი საკუთარი მიწები უნდა გადასცენ სახელმწიფოს და შემოსავალიც უნდა აძლიონ ამავე სახელმწიფოს. დიდებული სოციალური სამართლიანობა კი არის, თუ თქვენც დამეთანხმებით!..

ამ „სოციალურ სიკეთეს“ ისიც უნდა დავუმატოთ, რომ გლებებს ნება არ ექნებათ თავისებურათ დაიმუშაონ თავისი მიწა-ვენახები. იმათ უნდა იმუშავონ იმ ჩანოვნიკურ გეგმით, რომელსაც გამოუგზავნის სამინისტრო, ვინაიდან „კომმუნისტურ მანიფესტის“ წყალობით გლები

გარდაიქცევა უბრალო ჯარისკაცად შრომის ლაშქრისა. ასეთია საბოლოო იდეალი მარქსიზმისა!

მე ვიცი, რომ ჩვენი დასელები სასტიკად უმაღავენ მუშებსა. და ნამეტნავად გლებებს ამ უზნეო იდეალს ჯარისკაცობისა და უუფლებობისას. ვიცი ისიც, რომ ჩვენი ახალგაზდობა, რომელიც „რუსეთის პარტიის“ დროშის ქვეშ დადგა, ვერც კი წარმოძღვენდა, რომ ისინი იმპერიალისტებათ გადაიქცეოდნენ და სოციალურ სამართლიანობისა, თავისუფალ ასოციაციებისა და კოოპერაციების დაარსების ნაცვლად, ჩვენი გლებების გასალდათებასა და გაბოგანობას იქადაგებდნენ.

დაე, პატიოსანი ხალხი ჩაუკვირდეს ამ ტრალიკულ მდგომარეობას. იქნება მაშინ მაინც მიხვდნენ, რომ საზარელ ისტორიულ გაუგებრობისა გამო, ისინი იწვევ-

დენ ჩვენს ხალხს არა სოციალურ გათავისუფლებისაკენ, არამედ თვითმკვლევლობისა და ნებაყოფლობით დამონებისაკენ.

თუ აღმაშფოთებელი სირეგვნეა ძველი სახლის დანგრევა, როცა ახალი არა გვაქვს, თუ გამცემლობას უდრის ხალხის ძველ უფლებათა უარის ყოფა საოცნებო მომავლისათვის, მეტ კოდვათა და მძიმე დანაშაულათ უნდა ჩაითვალოს მოწოდება ხალხისა პოლიტიკურ და სოციალურ თვითმკვლევლობისაკენ; თავის თავზე ხელის აღებისაკენ, სალდათობისა, უუფლებობისა და ნებაყოფლობით დამონებისათვის, იმის გულისათვის, რომ ათასი ვერსის სიშორიდან ჩვენ ხალხს ვილამაც უცხო, გაუგებარ ენაზე ბრძანებანი უგზავნოს...

III.

... იმავე მოუფიქრებლობისა, სოციალიზ-

მისა და ამ სოციალიზმის ზნეობრივ მო-
თხოვნილებათა. საანბანო კემშარიტე-
ბათა უცოდინარობის ბრალია ის საზა-
რელი გარემოება, რომ ასე ვაღმერთებთ
კაპიტალიზმს, როგორც პროგრესიულს
სოციალურ ფაქტორს.

კაპიტალიზმი, ე. ი. მითვისება ხალ-
ხის შრომის ნაყოფისა მექარხნეთა, მო-
გირავნეთა, მევახშეთა, ბანკირებისა, ჩარ-
ჩებისა და სხვა წურბელებისაგან... ჩვენ
უმეცარ დასელებსა და მათ თანამოდვა-
წე სომხის პლუტოკრატებს, როგორიც
არის, თუნდა, იშხანიანი—პროგრესის ფაქ-
ტორი ჰგონიათ. ჩარჩები, მევახშეები,
მოგირავნეები და მთელი პლუტოკრატია
რომ ცოდვების დამალვასა და თავის
თავის გათეთრებასა სცდილობენ, ეს აღ-
ვილი ასახსნელი და სრულიად ბუნებრი-
ვია, მაგრამ ვარწმუნებ ჩვენ დასელებსა და
მათ თანამოსაგრე იანცებს, რომ უკვ-

დავ შჩედრინის გმირები ჟივოდეროვები, კოლუპაევეები და რაზუვაევეები პროგრესის მამოძრავებლად ვერ გადაიქცევიან, მარტო ამიტომ, რომ სახელათ დაირქვან ჟივოდერიანცი, კოლუპიანცი, თუ რაზუვიანცი.

კაპიტალიზმი, პლუტოკრატია და პროგრესი? მაშინ ხომ მუშათა მთელი მოძრაობა, მთელი სოციალიზმი ბარბაროსობათ გარდაიქცეოდა, რადგანაც ერთიცა და მეორეც კაპიტალიზმის ყოველგვარ ფორმის წინააღმდეგაა მიმართული. ნამეტნავად კაპიტალიზმის დიდი მტერია სახელმწიფოს მოტრფიალე გერმანიის სოციალდემოკრატია, რომელსაც მთელი თავისი პროპაგანდა კაპიტალიზმისა და პლუტოკრატიის წინააღმდეგ აქვს მიმართული. თვით სომეხმა მუშებმა, რომელთაც, სხვა ეროვნების მუშებთან ერთად, ამას წინათ სტამბოლში პირველი მაისი

იდღესასწაულეს, თავის პროკლამაციაში გამოაცხადეს: „ძირს ბურჟუაზიაო!“ ჩვენ დასელებს კი—იშხანიან-ჟივოდერიანც-რა-ზუვიანცებთან ერთად,--კაპიტალიზმი პროგრესის კვარცხლბეკზე წამოუსკუპებიათ!

როგორ მოხდა ეს? რა არის იმის მიზეზი, რომ ჩვენი დასელები სოციალიზმის სახით კაპიტალიზმს ხოტბას უგალობენ და სოციალურ ურთიერთობის ნაცვლად „შრომის ლაშქარს“, გლახთა გაბოგანობას, უმიწაწყლოთ დარჩენასა და დამონავებას ქადაგებენ?

ამის უმთავრესი მიზეზი გახლავთ საყოველთაო უმეცრება, საყოველთაო სიბრიყვე (ПОГОЛОВНОЕ БЕЗГРАМОТНОЕ НЕВЪЖЕСТВО) ჩვენი დასელების მეთაურებისა, ჟურნალისტებისა და მქადაგებლებისა (პროპაგანდისტებისა). მათ გაიგონეს ცრუ-მეცნიერული ფორმულა და თვითონ კი ძალა არ შესწევდათ გაერკვი-

ათ, შეეგნოთ ფუქსავატობა ამ ვითომდა სოციალურ კანონისა. მერე, რომ იცოდეთ, რა ადვილი, რა უბრალო იყო, ამის შეგნება.

ფორმულა იგი ღალადებს: „საზოგადოების სტრუქტურა (ნაშენობა) და განვითარება დამოკიდებულია წარმოების ფორმისა და დარგებისაგან“ *). თანამედროვე სხვილი წარმოება, თუნდა კაპიტალისტურიც, თავისთავად პროგრესიულია; მაშასადამე, კაპიტალიზმი არის პროგრესის მამოძრავებელი.

ამაზე დიდ სისულელეს ვერც ერთ კეთილსინილისიერად დაწერილ სამეცნიერო წიგნში ვერ იპოვნით. ფორმა და დარგები წარმოებისა დამოკიდებულია იმ ხელსაწყოზე, შრომის იმ იარაღებსა და მანქანებზე, რომელიც აქვს ამა თუ იმ

*) „Форма и виды производства обусловливают структуру общества и его развитие“.

საზოგადოებას. მანქანები და იარაღები — ნაყოფია კაცობრიობის ცოდნისა და გამოგონებისა, ხოლო თვით წარმოება, ე. ი. მოხმარება მანქანებისა და იარაღებისა, დამოკიდებულია მუშათა ტექნიკურ და გონებრივ განვითარებაზე. ამ გვარად, წარმოება ისე, როგორც მხატვრობა, პოეზია და ლიტერატურა, წყარო, დასაბამი კი არ არის პროგრესისა, არამედ ნაყოფია კაცობრიობის ცოდნისა, გამოგონებისა და გონებრივ განვითარებისა. ეს ისეთი უბრალო, ნათელი და თვალსაჩინო ცნებაა, რომ მიყრუებული სოფლის მუშა და გლეხიც კი ამასვე გეტყვისთ, რასაც მე ვამბობ.

ხოლო მეცნიერების არც ერთ აღმოჩენასა, შრომის იარაღებისა და მანქანების გამოგონება — გაუმჯობესებაში არც ერთ კაპიტალისტს მონაწილეობა არ მიუღია: ყველა ეს შედეგია მეცნიერე-

ბისა, ხალხის გენიოსურ შემოქმედებისა და იმ დიდებულ გამომგონებელთა მეცადინეობისა, რომელნიც გამოვიდენ დაბალი ხალხისა და მუშათა შავ-ბნელ წიალიდან.

რას გააკეთებდა მთელი ქვეყნის მილიონები, ოქროები, საფეიქრო, საქსოვი მანქანა, რომ არ მოეგონებინათ; რკინის გზები და გემები რომ არ აეშენებინათ; ორთქლით მოძრავი მანქანები და ელექტრონი, რომ არ აღმოეჩინათ? და ყველა ეს კი აღმოაჩინეს, მოიგონეს და გააუმჯობესეს ხალხის წიალიდან გამოსულმა დიდებულმა მუშა-გენიოსებმა.

საფეიქრო მანქანა მოიგონა საწყალმა დაღაქმა არკრაიტმა.

პირველი ორთქმავალი და რკინის გზა ააშენა მაღაროს ღარიბმა მუშამ სტეფენსონმა:

პირველი გემი ააგო უბრალო ტეხნიკოსმა ფულტონმა, სოციალიზმის დიდე-

ბულ მამის რ. ოვენის დახმარებით და სხვა და სხვა.

კაპიტალიზმმა კი მხოლოდ შეისყიდა, მოიტაცა, მიისაკუთრა ხალხის გენიოსობით შექმნილი დედებულის გამოგონებანი. სხვის შრომისა და შემოქმედების ნაყოფის მითვისებასა და მონოპოლიას კი კაცობრიობა უწოდებს მტაცებლობასა, ძარცვა-გლეჯას და არა პროგრესს.

მეცნიერების აღმოჩენათა და ხალხის გენიოსობით გამოგონებათა სწორეთ ამ კაპიტალისტურმა მტაცებლობამ და კაპიტალიზმისაგან ხალხთა შრომის ნაყოფის მხეცურმა ექსპლოატაციამა და ძარცვა-გლეჯამ გამოიწვია ის დიადი სოციალური მოძრაობა მეცხრამეტე საუკუნისა, რომლის დროშის ქვეშაც დგებიან მუშები ყველა ქვეყნისა და მათ შორის სომეხი მუშებიც. დიახ, სომეხი მუშები და არა, სომხისა თუ სხვა ეროფ-

ნების კაპიტალისტები, კლერიკალები და მათი დამკაშ—მოსამსახურენი: ზოგიერთი ინტელიგენტი, ბიუროკრატები და თფილისელი მეეზოვენი!....

იმპერიალიზმი და მეობადაკარგული ცენტრალისტური დამორჩილება, ნაცვლად საერთოშორისო ურთიერთობისა თანასწორუფლებიან ეროვნებათა;

გაბოგანობა, უმიწაწყლოთ დატოვება გლეხებისა, დამუშავება მამულებისა ბიუროკრატების ბრძანებისამებრ საიმპერიო ცენტრიდან, ნაცვლად იმისა, რომ თვით გლეხები და მუშები განაგებდენ და თავისუფლად, ძმურის შეთანხმებით ხმარობდენ მიწასაც და შრომის იარაღებსაც;

ქებათა ქება კაპიტალიზმისა და პლუტოკრატებისა, ნაცვლად ხალხის შრო-

მის ნაყოფის კაპიტალისტურ მტაცებლობის მოსპობისა;

შექმნა „შრომის ლაშქარისა“, ე. ი. დამონება შრომისა, ნაცვლად შრომის განთავისუფლებისა... აი ის გორა დებულეებათა, რომლის მწვერვალზედაც სწაღიათ აღმართონ დროშა სოციალიზმისა! მაგრამ ეს ხომ წინასწარგანზრახული, ბოროტი და—ვიტყვი გულახდით—ანგარებით აღსავესე დამახინჯებაა ძალა-ბატონობის მოყვარულ კარიერისტებისაგან იმ დიადი მოძღვრებისა, რომელიც გვასწავლის და გვიქადაგებს ძმობა-ერთობას, გვასწავლის და გვიქადაგებს თანასწორუფლებით აღჭურვილთა სოლიდარობას, სოლიდარობას იმ გულ-გონება განათლებულ ხალხთა შორის, რომელთაც თვისი ცხოვრება უნდა მოაწყონ ისე, როგორც თვითონა სურთ, თავის ნებით შეუთანხმდებიან რა თავის მეზობლებსა, ამა თუ იმ

ოლქის თანამოქალაქეებსა თუ ეროვნებას... დიახ ეროვნებას.

როგორც ქრისტიანობა—ქადაგებს რა:

„ნუ იქნება აქვენ შორის ნურცა ელ-ლინი, ნურცა იუდეველი, რამეთუ ძმანი ხართ ქრისტეს მიერო“ — არ უარჰყოფს ეროვნებას, პირიქით, მან დაამყარა მრავალი ეროვნული ეკლესია და მათ შორის ჩვენი, ქართული, ეკლესიაც, ისე სოციალიზმიც—აღიარებს რა ეკონომიურ თანასწორობას და ძმობა-ერთობას ხალხთა შორის, განურჩევლად სარწმუნოებისა და მოდგმისა, გვასწავლის ეროვნებათა ძალით მოსპობას კი არა, არამედ გვასწავლის და გვიქადაგებს, რომ თითოეული ერი უნდა განვითარდეს ყოველის მხრით და თავის ნებით ჩაებას კაცობრიობის სოლიდარულ ფედერაციის ფერხულში.

ვინც ეს საანბანო ჭეშმარიტება არ

იცის, ის არ არის სოციალისტი და სწორეთ იმიტომაც ვამბობ; რომ:

სოციალისტები კი არა, იმპერიალისტები არიან-მეთქი ჩვენი დასელები, ვინაიდან ისინი ქადაგებენ „შრომის ლაშქრის“ მოწყობასა და ჩვენი გლეხების უმიწაწყლოთ დატოვებასა.

სოციალისტები არ არიან ისინი, რომლებიც ამოჰფარებიან ჩერნოვისა და მის მეგობრების დროშას, მათის პროგრამა მინიმუმით, ვინაიდან, როგორც არ არსებობს მაქსიმუმი და მინიმუმი პატიოსნებისა, არამედ არსებობს მარტოოდენ პატიოსნება, ისე არ არსებობს მინიმუმი და მაქსიმუმი, არსებობს მხოლოდ სოციალიზმი.

ჩვენი დასელები შეიძლება იყვნენ საიმპერიო დემოკრატები, სოციალ-დემოკრა-

ტები, ან კიდევ რაცა გნებავთ, მაგრამ ისინი სოციალისტები კი არ არიან.

აქ საჭირო არ არის სოციალიზმის შესახებ სიტყვის გაგრძელება. მოგაგონებთ მხოლოდ, რომ ეს სიტყვა პირველად შემოიღეს თავისუფალ ინგლისის შეილებმა რობერტ ოვენმა და მისმა მეგობრებმა ამ ოთხმოცი წლის წინად და ნიშნავს საზოგადოებრივობას, ე. ი. წარმოება, განაწილება, მოხმარება, აღზრდა, ჰიგიენა და მთელი ცხოვრება წესრიგდება თვით საზოგადოებისაგან, საკუთარის თაონობით, ნებაყოფლობითა და თანხმობით მოხმარებელთა შორის. არავის გარეშეს, თვით პარლამენტსა და ბიუროკრატისაც კი, ნება. არა აქვთ ჩაერიონ მათ საქმეში... არც შრომის ლაშქარს, არც მინიმუმებს, არც იმპერიალიზმს, არც „ყოვლადმოწინავე“ სომხისა, თუ სხვა კაპიტალიზმს აქ

ხელი არა აქვს, და არცა ჰქონიათ. გაიგეთ?

ყველა ჩვენი მყვირალა, მოკამათე, ცილისმწამებელი და ხშირად ერთმანეთის დამბეზღებელი პარტიები, არიან მხოლოდ და მარტო დემოკრატები ევროპიულის აზრით. — რადიკალ-დემოკრატები, ანუ სოციალ-დემოკრატები, მაგრამ მაინც დემოკრატები.

მოგაგონებთ დემოკრატიის პროგრამას, რომელიც აღნიშნა ლიბკნეხტმა-მამამ ჩრდილო-ამერიკის შტატების დიად დემოკრატიის წინაშე.

„რა გვინდა ჩვენ?“

„თავისუფლება სიტყვისა და ბეჭდვისა. თავისუფლება სინიღისისა და საყოველთაო სწარჩევნო უფლება სახელმწიფო, სამოქალაქო და სათემო საქმეებში.“

„უსასყიდლო და ეროვნული საყოველთაო სწავლება; სკოლები ყველასთვის კარლია.

„მუდმივი ჯარის მაგიერ, ეროვნული მილიცია; საერთაშორისო სამედიცინო სასამართლო; დედაკაცისა და მამაკაცის უფლებათა გათანასწორება.

„კანონმდებლობითი მფარველობა შრომისა; (სამუშაო დროს შემცირება, სანიტარული გაუმჯობესებანი და სხვა...)“

აი, ის პროგრამა, რომელიც შემუშავებულია დემოკრატიის პარტიის დამაარსებლისა და ხელმძღვანელისაგან. ამ პარტიის დროშის ქვეშ სურთ დადგენ ჩვენი დასელები და თაყვანისმცემელი ჩერნოვებისა და მიხაილოვსკებისა და დადგებოდენ კიდევ რომ... რომ შეეძლოთ შეგნება და ან დაწყვეტა პლენაროვებისა და

ჩერნოვებისაგან გაბმულ იმპერიალისტურის ქსელისა.

„აი ის რეფორმები — დაამთავრა სიტყვა ლიბკნეხტმა, რომლებიც უკვე შემოდებულ იქმნენ, ან მალე შემოიღებენ დაწინაურებულ ქვეყნებში და ეს რეფორმები სავსებით შეესაბამება პრინციპებს დემოკრატიისასაო“. სრული ჭეშმარიტებაა! სრულიად შეჭფერის დემოკრატიას.

ამ პროგრამას ხელს მოაწერს ყველა ჭკვიანი და პატიოსანი ქართველი, განურჩევლად წოდებისა და საზოგადოებრივ მდგომარეობისა. ამას მით უფრო ადვილათ ჩაიდენს ქართველი კაცი, რომ ბევრი ამ რეფორმათაგანი ჩვენ უკვე გვქონდა, ხოლო დანარჩენების მოთხოვნის უფლება გვაქვს იმ ხელშეკრულობათა წყალობით, რომლებიც დაგვი-

ტოვა ჩვენმა მამაპაპამ. მილიცია, არ-
ჩვენებზე დამყარებული სასამართლო, არ-
ჩვენებზევე დაფუძნებული ადმინისტრა-
ცია, ე. ი. ავტონომიური, ეროვნული
თვითმართველობა სამშობლო ენით, სა-
ხალხო საყოველთაო სწავლება... ამის
წინააღმდეგი შეიძლება იყვნენ მხოლოდ
პურიშკევიჩები და. მოუხეშავ უმეცრების
და ტრადიკულ გაუგებრობის გამო გა-
ოგნებული ჩვენი დასელები, რომელთა
ცხვირზედაც ხელი მოუკიდიათ რუ-
სეთის იმპერიალისტებს და ისე მიათრე-
ვენ მათ. ეს იმპერიალისტები ჰფიქრობენ
თავის ბატონობაზე; ოცნებობენ თავის
საკუთარ ბიუროკრატიის შექმნაზე, რომ
შორიდან უბრძანონ ხოლმე, ჩვენის ტურ-
ფა, მაგრამ უცხოთაგან შეგინებულ სამ-
შობლოის გაბოგანოებულ გლეხებისა და
მუშათაგან შემდგარ „შრომის ლაშქარს“.

საბრალოა მონა, თავის ბატონის წინაშე მუცლით მხოხავი! მაგრამ ის მონა, რომელიც ხოტბას უგალობს ნებაყოფლობითი მონობას, უსაზიზღრესია.

საბრალონი არიან ისინი, ვინც სახლს ანგრევენ, თუმცა შეიძლება თავი გაიმართლონ იმითი, რომ ახალი სახლის აშენებამდი ქოხში, ფარდულში ვიცხოვრებთო.

მაგრამ რა უნდა ითქვას იმათ შესახებ, რომლებიც ფეხითა სთელენ თავისსა და მეზობლების უფლებებს, როცა უკეთესი არ მოუპოვებიათ?

რაც უნდა ღმობიერნი ვიყოთ, ეს კი უნდა ვუთხრათ: ბატონებო, უარჰყავით მხოლოდ თქვენი საკუთარი თავი, თუნდაც მონათ მიეყიდეთ სხვას, მაგრამ მეზობლებისა და თანა მოქალაქეთა მაგივ-

რათ ლაპარაკისა და მოქმედების უფლება კი არა გაქვთ. ისტორია შეგარცხვენთ თქვენ, შთამომავლობა — კი... შეგაჩვენებთ!..

